



Nunatta Karsiata 2018-imut naatsorsuutaasa Inatsisartunit akuerineqarnissaat pillugu Inatsisartut aalajangiiffigisassaattut siunnersuut.

(Aningaasaqarnermut Nunanilu Avannarlerni suleqatigiinnermut Naalakkersuisoq)

(Aappassaaneerneqarnera)

Demokraatit pingaarnertut naammagisimaarpat kukkunersuisoq Inatsisartunit toqqagaasimasup 2018-imut Nunatta Karsiata naatsorsuutai oqaatigimmagu eqqortumik takutitsisuunerarlugit kiisalu annerusumik kukkuneqanngitsut amingaateqanngitsutullu.

Taamatullu oqareerluta ataatsimiititaliamit apeqqutinut assigisaannillu akissuteqarnermi Naalakkersuisut sukkanerusumik, erseqqissumik tungavilersukkanik, pitsaasutsikkullu qaffasinnerusunik akissuteqartarnissaat kissaatiginassangaluarpoq. Tamannami suleqatigiinnermut pitsanngorsaallunilu suliat ingerlaartarneranut oqilisaataassussaavoq, taamaalillunilu ataatsimiititaliaq qalleqqissaasunik apeqquteqaqqittariaarutissaaq.

Demokraatit Naalakkersuisut sakkortuumik kaammattorusuppai Kukkunersuiinnermut Ataatsimiititaliap isumaliutissiissutaa peqqissaarullugu misissussagaat, taamaalillutik massakut pissutsit naleqqutinngitsut aaqqiiviginiarlugit. Taassumallu saniatigut suliamut tamatumunnga pisoqaraangat ataatsimiititaliamut ilisimatitsissuteqartarnissaanut Naalakkersuisut kaammattussuagut.

Taassumallu saniatigut Demokraatit Kukkunersuiinnermut Ataatsimiititaliap isumassarsiaanut tapersiipput tassa Kukkunersuiinnermut Ataatsimiititaliami ilaasortat qinigaaffimmi piffissami tamakkiisumi qinerneqartarnissaat. Tamassumap sulineq atajuartuunissaanut qulakkeerinnittussaammat, aammalu tamat oqartussaaqataanerani sulieriaatsimut pitsaaqutaassalluni.

Deloitte kukkunersuiisussatut toqqarneqarnissaanut isumaqataavugut.

Taamatut oqaaseqarluta Nunatta Karsiata 2018-imut naatsorsuutaa akueraarparput.